

**POESIE DEDICATE  
AL POETA  
ANDREA MAIORANA**

*Per l'occasione di un concorso di poesia,  
dedico al defunto poeta Andrea Maiorana*

## **PUETA, VIDDANU, SINNACU E PUSTINU, FUSTI L'EMBLEMA DI LU BUSITANU**

Facistu veru bonu a organizzari  
lu primu Concorsu di Puisìa  
e mi piacissi tantu di parlari  
di la bonarma di lu zu Nniria,  
pueta summu di geniu esemplari  
chi spissu puru ‘u Sinnacu facià.  
Ma nun si muntau mai, sempri a zappari  
udiannu la minzogna, e ‘a ippocrisia.

Era ‘n Amicu chi piacià ‘ncuntrari  
pirchè ti dava stima e simpatìa,  
s’eri cufusu e t’jivi a cunsigghiari  
lu cori nta li manu ti mittìa.  
‘Na vota misi tantu a caminari,  
quannu lu portalettiri facià,  
chi di Busetu jiu a Casteddamari  
facennu versi mentri chi chiuvìa.

Poi a la turnata, pi la ‘Vimmaria,  
un picciutteddu ‘ncuminciau a diri:  
“Arriva! sta vinennu ‘u zu Nniria!  
Ma cu ssu tempu unn’è chi jiu a finiri?  
Tuttu vagnatu e ‘a giacca ci fumìa!”  
Ci dissi: “Bertu meu, devi sapiri,  
quannu la Musa ti ‘ncontra pi via,  
d’unn’è chi voli Idda s’av’ a jiri.”

E di sti caminati, vi lu giuru,  
criditimi, ni fici veru assai!  
Fici li parti di lu pani duru,  
la vurpi, lu riloggiu, peni e guai,  
la cincucentu chi sbattiu a muru,  
la scummissa cu Tresa nun ci ‘a sai,  
lu megghiu sirvizzu è fattu ô scuru  
e di lu piru chi ‘un ni fici mai.

Ora st’Amicu, stu galantumuni,  
ormai nun c’esti chiù nta li presenti,  
ma fistiggiatu è di la Cumuni,  
cu Sinnacu, Assessura e tanta genti,  
pi ‘mmurtalari stu gran Puituni  
di summa doti, di gran sintimenti  
chi lu chianciu di puru lu stratuni  
quannu lassau l’Amici e li Parenti.

E pi quant’era saggio ed onoratu  
puru la morti rispettu ci usau.  
Ntô viri e sviri ci tirau lu ciàtu  
chi forsi forsi nun si n’addunau.  
Morsi nta la pultrona appinniccatu  
e ‘un potti diri soccu si sunnau.  
S’avìa lu tempu nn’avissi avvisatu  
dicennu: “A lu Parnasu mi ni vaju!”

*Trapani, 1988*

*Turi Sucameli*

## A LA MIMORIA DI LU PUETA ‘NTRIA MAIURANA

Parlu di Bruca, ch’è la me cuntrata,  
e di li so abbitanti chi ci sunnu;  
è tutta genti onesta e sistimata,  
travagghiatura e òmini di munnu.  
Menzu c’è puru occhi varca abbuccata  
chi si viri girari sempri ‘n tunnu,  
ma li megghiu pueti chi esisteru  
a Bruca, quasi tutti si ni jeru.

Quannu ricorda la memoria mia,  
di li pueti tutti chiddi veri,  
prima di tutti veni lu zzu ‘Ntria,  
puru li Costi e tutti li Scuteri;  
Tutti pueti di granni valìa,  
facianu versi di tanti maneri:  
quannu chi si mittianu a puisiari  
era veru ‘na cosa di scialari!

Stiornu semu cca pi ricurdari  
la memoria di un pueta veru,  
un omu ch”un si po dimenticari:  
‘Ntria Maiurana, di cori sinceru!  
Penzu lu jornu chi vinni a mancari,  
parenti e amici, tutti lu chianceru.  
Lu corpu scumpariù ‘n tempu di nenti,  
ma lu recordu so sempri è prisenti!

*Bruca, 2007*

*Francesco Savalli*